

## Gesang vun de Fiiss fir d'Jeeër

Dem Renert hu se an der Stad  
En herrlecht Monument gesat  
An d'Fiiss am Bambësch musse béissen  
Wann se voll Freed rëm op se schéissen

De Renert, so'n se, hätt e Frack  
An huet héich literaresch Éieren  
Do fro' mer eis, wat fir eng Brütt  
Lo mengt, si misst eis reguléieren?

Fiiss wëlle net wéi d'Mënsche ginn  
A Freed drun hunn, mam Doud ze spillen  
Mär friesse, wa mer hongreg sinn  
Mär hu kee blöde Spaas um Killen

Mär friesse gären Hingerfleesch  
Dann hetzt der d'Honn op eis, wéi wëll  
O mammomamm, sidd der lo queesch?  
Friesst där net och emol eng Pëll ?

Fir jiddwer Fiisschen deen der kritt  
Werft d'Fuussemamm iech flott zwee neier  
Fir een dee fällt, stinn zwee der op  
An d'Munitioun gétt iech eng deier

Och Gas a Klappjuegd ass guer näischt  
Mat deem ee géint de Fiissche kënnt  
Well mär si vu Natur méi schlau  
Wéi all domm Sau mat enger Flënt

***De klenge Renert***

